

INUIT ATAQATIGIIT

INATSISARTUNI



17. august 2012

UKA 2012/24

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inuit 18-it qaangerlugit ukioqalereersimasut piginnaangorsaaqqiinernut piareersimannigitsut imaluunniit piginnaangorsaaqqiinemik aallartitsinissamut ikiortariaqartut, napparsimareernerup kingorna nukittorsarneqarsinnaaneritut atatillugu periarfissat pillugit upernaakkut 2013-imi ataatsimiinnermi nalunaarummik agguanneqartussamik suliaqaqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalunaarut kingusinnerusukkut nuna tamakkerlugu iliussissamik pilersaarusiortoqarnissaanut tunngavissiisaaq.

(Inatsisartunut ilaasortaq Olga P. Berthelsen, Inuit Ataqatigiit)

Tunngavilersuut

Napparsimasut katsorsartinneqareernerisa kingorna nukittorsartinneqartalernissaat pillugu siunnersuuteqarpunga, isumaqarama innuttaasut tamarmik assigiimmik ulluinnarni inuunissamut periarfissinneqarnissaannut, inuit nalituumik inuuneqalernissaannut aammalu inuit inuiaqatigiinni nalinginnaasumik innuttaaqataallutik peqataalersinnissaannut inuiaqatigiittut ilungersuuteqarnissatsinnut pisussaaffeqaratta. Napparsimanerit, sulitilluni ajutoorsimanerit, utoqqalineq imaluunniit inunnguuseralugu innarluuteqarneq, inuup ulluinnarni inooqataanermi periarfissanut peqataanissaanullu killiliisarpoq imaluunniit taamatut kinguneqarsinnaasarluni.

Nukittorsartinneqarsinnaaneq innuttaasunut neqeroorutaasassaaq, assersuutigalugu puiguttunngulernerup, qaratsakkut innarlerneqarnerup imaluunniit innarluuteqalernerup maannakkorpiaq imaluunniit siunissami qaninnermi annertuumik inuup ulluinnarni inooqataanermi peqataasinnaaneranut killiliisunngorluni nassataqassagaluarpas.

Sinaakkusiussat periarfissaasut iluanni inuit nalituumik inuuneqarnerat attatiinnarneqarsinnaaqullugu imaluunniit pitsannorsaaavigineqarsinnaaqullugu, eqqorneqartoq, eqqorneqartumut qanigisasut kiisalu pisortani ilinniarsimallutik sulisut peqataatinneqarlutillu suleqatigiissinneqartariaqarput.

Inuk eqqorneqartoq nukittorsaaniarnermi qitiutinneqassaaq, tamannali aatsaat iluatsissinnaavoq qanigisaasut qanimut peqataatinneqarnerisigut aammalu sulisut ilinniarsimasut ilisimasaat misilittagaallu toqqammavigigaanni. Sulisut ilinniarsimasut tassaasinnaapput nakorsat, peqqissaasut, oqallorissaasut, tagiartuisartut, isumaginninnermik siunnersortit imaluunniit nerisaqarnermik ilisimasallit (diætister).

Ajoraluartumilli ullumikkut imaappoq pisortat sullissiviinit eqqorneqartunut qanigisaannullu neqeroorutaasartut imminnut atassuteqartannginnerat imaluunniit ataqatigiittannginnerat. Tamatuma kingunerisinnaavaa eqqorneqarsimasup iternga tikillugu tamakkiisumik katsorsartinneqanngitsoornera, pineqartumut, ilaqaataasunut aammalu inuiaqatigiinnut kingunerluttumik. Napparsimasut katsorsartinneqareernerisa kingorna

nukittorsartinneqarsinnaaneq taamaammat aamma pitsaaliuinermi periusissatut isigineqarsinnaavoq kikkunnut tamanut iluaqusiisoq.

Pisortanut aningaasatigut allaffissornikkullu kingunerisassat

Aningaasaliissutaareersimasut iluini siunnersuutip piviusunngortinneqarsinnaanera ilimagineqarpoq aammalu nalunaarutip suliarineqarneranut allaffissornikkut sulisorisassat eqqarsaatigalugit årsværk affaq imaluunniit ilivitsoq naatsorsuutigisariaqarluni.

Namminersorluni inuussutissarsiuteqarnermut aningaasatigut allaffissornikkullu kingunerisassat

Kingunerisinnaasaanik soqanngilaq

Innuttaasunut aningaasatigut allaffissornikkullu kingunerisassat

Innuttaasunut aningaasatigut allaffissornikkullu pitsaanngitsumik kinguneqassanngilaq.

Kingusinnerusukkut iliuusissamik pilersaarut timalersorneqartussanngorpat naatsorsuutigisariaqarpoq, tamanna inuit nalituumik inuuneqalernissaannut ilapittuutaassasoq inunnut ataasiakkaanut, ilaqutaasunut inuiaqatigiinnullu iluaqusiisumik.